

Garttenbüchlein.
Unterricht von
allerley art Bäumen zu
pflanzen / vnd wie derselbigen vol-
gendes abzuwarten / mit sonderm
fleiß beschriben /

Durch
Wolfgangum Schmak.
Anno, 1501.

Vnd jekund in Truck verordnet /
Durch
Martinum Schalling.



Im ersten Buch Mose/am 2.
Gott sagte den Menschen in den Gart-
ten Eden / das er den bawet vnd bewaret.

1574.

Den Fürsichti-
gen/ Erbaren vnd Weisen
Herrn/ Burgermeister vnd Rath
der Pfaltzgrauischen Churfurst Am-
berg/meinen Günstigen Herrn.

Gottes Gnad vnd alle Wolfart durch
Jesum Christum/ıc.

Wirsichtige/ Erbare
vnd Weise Günstige Herrn / Es
haben zu allen zeiten/die verständigen Leut/
(auch vnter denen Völkern/die Gottes er-
kündnuß auß seinem heiligen wort nicht ge-
habt) nicht allein auff den Veldbau/mög-
lichen fleiß angelegt / Sondern vff beson-
dere verschlossene Gärten / mit erzichung
schöner Bäume/vff pflanzung guter Kreu-
ter vnd fruchte/allerley mühe vnd kosten an-
gewendet: In betrachtung des grossen lusts
vnd nuzes / dene die erbawten Gärten für
vnser arbeyt / so reichlich vnd vilfältig ge-
ben. Aber Gottes wort weist vns vil höher-
re vnd wichtigere vrsach/ die vns/ das gärten/
len/

len/ in sonderheyt/ sehr angenehmb vnd kurt
weylig machen.

1. Denn da stehet erslich das Exempel
Gottes des Herren selbst/ welcher es bey er-
schaffung vnd segnung / allerley Bäume
vnd Kraut auff dem Felde / darvon sich
Menschen vnd Viehe mit einander enthal-
ten sollten/ nicht bleiben leisset/ Sondern
schaffet dem Menschen noch ein besondern
Lustgarten/ den wir das Paradis nennen/
vnd setzet den Menschen darein. Gen. am 1.
vnd 2. Cap. Denn Gott der Herr ließ auff-
wachsen auß der Erden allerley Bäume/
lustig anzusehen/ vnd gut zuessen. Vnd den
Baum des Lebens mitten im Garten.
Das ist nicht allein ein schöner Lustgarten/
darein der Mensch wirt gesezt/ Sondern
auch der edelste nutzgarten. Denn die frucht
vom Baum des Lebens / sollt ime alle seine
Lebenskräften vermehret / vnd gestärket/
auch vor schwachheit vnd abnemen / bewa-
ret haben.

2. Darnach ist hie Gottes befehl/ auch
vor dem fall / das der erschaffene Mensch
den Lust vnd nutzgarten Gottes/ nicht von
dem Viehe verderben/ oder sonst vmbkom-
men lasse / sondern hawe vnd beware.

3. Da

3. Da es nun dem Menschen an gehülff
fen mangelt/schaffet GOTT im Paradis/
Euam auß des Mannes Adams Rippe/
bringe sie zu ihm/vertrauet sie ihm zum Weib
vnd gehülffen/ vnd segnet sie/etc. Stiffet
also Gott/ in dem allerschönesten Lustgart
ten/ den höchsten Ehren vnd freudenstande/
Nemlich/ den heyligen Ehestande.

4. Aber solches alles/ ordnet Gott im
Lustgarten / den ersten Tempel vnd Got
tesdienst / mit welchem Adam sampt allen
nachkommen/seinen gehorsam/ gegen Gott
seinem Schöpffer / üben vnd erweisen sol
len: Inn deme/das er von den verbottenen
früchten des Baums nicht essen/Sondern
bey demselbigen ehrliche versammlung hal
ten/von Gott vnd schuldigem gehor^{am} ges
genime/predigen/ ine loben vnd preisen soll
te/etc. Laut des befelchs: Du sollt essen von
allerley Bäumen im Garten: Aber von
dem Baum des erkändnuß gutes vnd bö
sens/sollt du nicht essen. Denn welches tags
du dauon issest/sollt du des Todes sterben.

5. Vnd das noch mehrer ist/ nimpt der
H. Geist/hin vnd wider/von den gepflanz
ten Baumgärten / allerley feine erinnes
rung/zum Hausregiment/weltlicher Herrs

schaffe / vnd Religions oder vnser Seelen
seligkeit/sachen/ sehr dienstlich/ das nit wol
möglich ist / wer darauff acht geben will/
vnd mit Gärtnerey vmbgehet / zu solchem
desto mehr lust vnd liebe täglich gewinnen
muß.

Von einem Gottföchtigen Menschen
sagt David/ Psal. 1. Er ist wie ein Baum
gepflantzet an den Wasserbächen/ der seine
frucht bringet zu seiner zeit: Vnd was er
macht/ das gereth wol. Jerem. 17. Vnd
ob gleich ein holtz kompt / förcht er sich doch
nicht / sondern seine Blätter bleiben grüne/
Vnd sorget nicht/ wenn ein dürr jar kom̃t/
sondern er bringet on auffhören seine frucht.

Im 128. Psalm/ vergleicht David einen
Ehemann einem Oelbaum/ neben dem der
Weinstock gepflantzet/ daran gehefftet wirt/
darauff ruhet/ vnd frucht bringet. Vnd das
Gottselige Eheweib/ ist wie ein fruchtbarer
Weinstock vmb das Hauß herumb. Wie
hette doch der heilige Geist den Weiblichen
stand mit schönern bilde abmalen vnd er
heben können / denn mit dem gewächß des
edlen Weinstocks? Welcher wol ein schwaches
/ verachtetes Holz anzusehen ist/ jedoch
seine lust vnd allerley nuß/ Sonderlich den
lieblichen

lieblichen Trauben/ vnd kößlichen getranck
von sich givet.

Sprach 30. Laß dem Kinde seinen willen
nicht in der jugend/ Beuge jm den halß / etc.
(gleich wie ein junges Reiß oder Zweyg)
weyl es noch jung ist / etc. Vnd David Psal.
128. Deine Kinder werden seyn wie die ol-
zweyge vmb deinen Tisch her. Denn der
Oelbaum das Oele nicht läßet oder auß-
geußet/ es werden dann seine zweyge mit ei-
nem Eisen geöffnet vnd auffgerissen/ Das
durch die fleissige Kinderzucht / den Eltern
fürgebildet ist. Vnd werden daher noch
haut bey tag / von den Pelkermeystern / die
ort / da die jungen Kern oder andere Reiß
beysammen stehn/ abgepelket werden / vnd
auffwachssen/ ein junge Schul genennet.

Daniel. 4. Eines Königes vnd Regens-
ten Ampt / zeiget Gott dem Könige Nebu-
kadnezar / durch einen Baum mitten im
Lande der war sehr hoch/ groß vnd dicke/ sei-
ne höhe rāpchet biß an den Himmel/ vnd brey-
tet sich auß / biß ans ende des ganzen Lan-
des. Seine äste waren schön/ vnd trugen vil
früchte/ dauon alles zuessen hatte. Alle Thier
auff dem Veld funden schatten vnter ihme/
vnd die Vögel vnter dem Himmel saßen vff
A 4 seinen

seinen ästen/ vnd alles fleisch nehet sich von
im/ etc. Vnd Ose. 14. verheisset Gott/ er
wölle dem Königreich Israel seyn / wie ein
Thaw / das es soll blühen wie ein Rose/ etc.
Vnd seine wurzeln außschlagen wie Libai
non. Esai. 1. Drohet er dagegen dem Gott
losen Land/ es soll werden wie ein Eyche mit
dürren Blettern/ vnd wie ein Gartten ohn
Wasser.

Vnd das wir von Seyflichen sachen auch
etwas reden. Zu warhafftiger bekehrung
vnd Ehrilichem leben vermanet S. Joh.
Matth. 3. Thut rechtschaffene frucht der
buß / Es ist schon die Art den Bäumen an
die wurzel gelegt. Darumb welcher baum
nicht gute frucht bringt/ der wirdt abgehaw
en/ vnd ins feuer geworffen werden/ etc.

Gottes langmütigkeit gegen vns Men
schen / zeugt Christus Luc. 13. an/ mit dem
Feygenbaum/ an dem sein Herr kein frucht
findet/ vnd abzuhawen befiellet/ vnd sich den
Weingärtner erbitten leffet / das ers noch
ein jar mit ihm versuche/ vmb in grabe/ vnd
betänge in/ ob er wolt frucht bringen.

Das Gott für vns sorge/ lehret der Herr
Matthai 6. an den Blümlein erkennen:
Schawet die Lillen auff dem Felde / etc.
Denn

Den so Gott das Gras auff dem Felde
also fleydet/et. Wie vil mehr euch/Ihr
Eingläubigen.

Mit was lauter gnaden/Gott vns arme
Heyden anneme zur gemeinschafft Christi
bildet vns S. Paulus für Roma. 11. bey eis
nem wilden Olbaum/der in den guten Oel
baum eingepfropffet / seiner Wurzel vnd
safft theilhaftig wirt. So er aber nicht
gut thun will/wider abgehawen wirt/et.

Vnd Christus Johan. 15. Ich bin ein
rechter Weinstock / vnd mein Vatter ein
Weingärtner/et. Wer in mir bleibet/vnd
ich in ime/ der bringet vil frucht.

Die mittel/dardurch vns Gott in den ed
len Oelbaum eingepflancket/Nemlich/das
mündliche wort / vnd die hochwürdigen
Sacramenta/oder H. Kirchenampf/pre
set S. Paulus eben mit dem gleichnuß eine
Pflanzmeysters/in der 1. Corinth. 3. Ich hab
pflanket/Apollo hat begossen/Aber Gott
hat das gedeihen geben: Vnd David/Psal.
92. Die gepflanket sind im Hauß des Her
ren / werden in den Vorhöfen vnsers Got
tes grünen/ vnd wenn sie gleich alt werden/
werden sie denn noch blühen/fruchtbar vnd
frisch seyn.

Die Reher/vergleicht die Schrifft den
Füchssen / ja den kleinen Füchssen/ die des
Herren Weinberg verderben/Eant. 2.
Allerley Unkraut/distel/dorn/etl. die sich
selbst in einem Gartten finden/vnd eindrin-
gen wollen/Matth. am 7. vnd 13. Item
den Rauppen/Refen/vnd andern derglei-
chen Unzifer/ so den Bäumen einweders
am stammen/ fruchten oder blättern beschä-
digen.

Was liebliche gedanken kan geben ein
Apffelbaum? Gen. 3. Im Gartten ver-
sündigt sich Adam / an der schönen Frucht
des grünen Baums / vnd bringt vber sich
vnd alle Menschen/den ewigen Todt/et.

Matth. 26. Im Gartten hebet sich des
Herren leiden an/ da wirt er gefangen.

Actor. 10. vnd in der 1. Pet. 2. An dem
dürren Holz des Creuzes wirt das heyl wi-
derbracht. Im Gartten stehet der HERR
auff von den Todten/ Marci 16. Da wirt
auch zu erstenmal gesehen der lebende Herr
des Todtes/vnd Herrzog des Lebens.

Das auch aller Menschen thun/vnd diser
ganzen Welt pracht vnd freude/nichts vnd
zergänglich sey/ heisset Esaias im 40. cap.
an den Blumen im Feld vnd Gärten ler-
nen/

nen/ Alles fleisch ist Hey/ vnd alles sein gute/
ist wie ein Blum auff dem Felde. Ja
das Vold ist Hey: Das Hey verdorret/
vnd die Blum verwelcket/ Aber das Wort
vnsero Gottes/ bleibet ewiglich.

Vnd/ damit ich schliesse/ Gleich wie ein
fleissiger Gärtner gegen der Winters zeit
eiliche besondere Kräwtlin aufhebet/ in Kelle
er vnd gewelb setzet/ die andern bedecket/ die
jungen Bäume aber verbindet/ das ihnen
der kalte Winter nicht schade / vnd freuet
sich von Herzen gegen der Frülings zeit/ das
er sein Gärten wider besetzen / bauen vnd
zieren soll/ etc. Also spricht die Schrift/ sey
dieses ganze leben / ein eytel / trawriges vnd
betrübtes Jammerthal. Darumb neme
Gott seiner lieben Christen / immer einen
nach dem andern dahin / verwaret sie in
ihrem Schlafdämmertein/ Esai 56. biß der
fröliche Sommer des jüngsten Tags an
brechen wirt/ an welchem er auß allen gräbo
lein vnd hülen/ seine edelen Pflänzlin/ die
Christen / alte vnd junge / durch die lieben
Engel zusam bringen / vnd in den ewigen
Lustgarten des Himlischen Paradiß/ vers
setzen wolle/ etc. Luc 21

Mit

Mit solchen vnd dergleichen gedanken
haben zweiffels on die Könige Juda / Sa-
lomon / Assa / Bsa / vnd andere Gotsförch-
tige im Volck / ire Lustgärten gepflanzt
vnd vns mit irem Exempel / zur Gärtnerey
reysen wollen.

Nun ist die gemeynste flag der jenigen / so
zum Belzen lust tragen / das sie den Gärtn-
nern in die hende sehen müssen / vnd selb da-
von wenig bericht haben. Derhalben ich die-
ses Büchlein Wolffgangi Schmaß (so et-
wann vor 74. Jaren Gärtenmeyster im
im Closter Reichenbach gewesen) in druck
geben wollen / darin mit züflicher fürß vnd
guter ordnung / zusammen gezogen ist / was
zum belzen vnd abwartten der bäwm in ge-
meinen Gärten / fürnemlich erforder wirt.

Dieweil aber E. J. E. W. seib / vnd vil
auß ewer angehörigen Gmāyn / auff pflan-
zung Bürgerlicher Gärten sich begeben /
hab ich solches E. J. E. W. zugeschriben /
mein danckbares vnd schuldiges andenden
dabey zuerweisen / mit bitt / E. J. E. W.
woltens im besten von mir verstehn vnd auf-
nemen. Hiemit der gnade Gottes befolhen.
Datum Vilsack.

E. J. E. W.

Williger / Martinus Schalling.

Zum ersten.
**Wie man die Pelzer od
die Pelzstöck auß der erden
heben solle.**

Pelzer oder Pelzstöck auß der Erden zuheben / vnd andere junge Bäume vmbzusetzen / das sol man thun vmb Michaelis / Aber die aller beste zeit ist vor oder nach aller Heiligen / auß der ursach / damit die Bäume vber Winter des neuen grunds mögen gewonen / so mag man darnach im Mayen ohn alle sorg drauff pelzen: Es kompt auch lieber / denn auß den Stöcken / die man in dem Aprillen setzet. Etliche setzen ihre Pelzer inn dem Aprillen / an die end / da sie bleiben sollen / noch vil besser ist es inn dem Herbst / auß der ursach / wann in der zeit / von dem Herbst biß in den Mayen / vereint sich Wurtz vnd Erdrich / wenn nun der Mayen kompt / so steckt der stock in der Erden inn gantzer krafft / vnd inn vollem safft. Auch so man die Pelzer / oder die stöck auß der Erden heben wil / vnd on schaden an ein andre stat setzen / so

so sol man graben zwen / ober halt drei
schuch lang hindan von dem Stam / zu
rings umb den Pelzer / so tieff / bis man
die Hertzwurzel untergraben hab / wo
aber etlich wurzel zu lang weren / so soll
man sie abhawen.

Nota bene.

Das solt jr mit fleiß mercken / an dem
ausstehen / werden etliche würtzelein zer
knuscht / die soll man abschneiden / bis
auff das ganze Holz / vnd ruerlet
Rinden / so heylet es darnach gar schön
in der Eiden.

Von den gar klein Würtzelein.

Man soll mit allem fleiß verschonen
der kleinen würtzelein / so an den grossen
hängen / damit sie nit schaden nemen.
Ursach / sie geben den Bäumen die be
ste feuchtigkeit vnd safft / aber die grossen
wurzel tragen vñ halten den Baum.

Wie man die Pelzer kehren soll / gegen der Sonnen.

So man die Pelzer auß der Erden
hebt / so sol man sie mercken / vnd auß der
öbern rinden schneiden / ein märck / wo
er

er gegen der Sonne auffgang sey ge-
standen/ in aller mas soll man in hinweis
setzen.

Wann die Pelzer setzen soll in die Erden.

Ein Pelz: r zusetzen/ an die stat/ da er
hinfort bleiben sol / so sol man nach der
lang der wurzel ein grub machen/ auch
ist die gemein tieff der Pelzer eins knies
tieff. Ist der grund naß/ so soll man den
stamm nicht so tieff setzen: Ist der grund dürr
so mag man ihn tieffer setzen/ das er inn
den heißen tagen nicht außdorre: Ist der
grund sandtig vnd vnfruchtbar / so soll
man die gruben weit machen/ vnd eines
halben Manns tieff/ vnd zu vnterst inn
den grund soll man mist legen/ der wol
erfaulet vnd verwesen ist / darnach ge-
hört darauff ein gut feyst Erdrich einer
spann dick / darnach mehr so vil Mistes/
dann widerumb Erden / das thut man
so lang / biß die gruben noch eins knies
tieff bleibe/ so ist denn zeyt/ das man den
Pelzer widerumb setze.

Nota.

Man soll den mist vnd erden/ von dem
grund her auß wol treten vberinander/
darnach

darnach setze man den Pelzer auff das
Erdrich/ vnd theil die wurzel mit fleiß
von einander/ das sie geräum ligen/ vn-
gezwungen. Man soll auch kein wurzel
mit biegen/ In sonderheit die gar klein
wurzel/ vnd wie sie vor seyn gestanden/
so soll man sie hinwider setzen: Darnach
soll man drauff schütten feist Erdrich/
einer hand dick/ zc. Dann so soll man die
wurzel mit Erden wol aufffüllen/ das
nicht löcher vnter den wurzeln bleiben/
dieselben Bäume die nemen nicht gut
alter/ tragen auch wenig vnd darzu vn-
geschmache frucht.

Nota.

Man soll auch darob seyn/ das an den
stämmen in der Erden/ noch zu der wur-
zel/ so man den Pelzer setzt/ kein mist el-
ner guten querchen hand nit komme/ al-
lein hindan mit Erden vermischet/ ist er
nütz den Bäumen.

Wie man die grub soll zumachen.

Also habt jr vernommen/ wie man
die wurzel soll versehen. Nach dem soll
man ein solen mit Mist legen/ als weit
die grub ist/ vier finger dick/ darnach ein
solen wider mit Erden/ denn widerumb
mit

mit miß wol getretten alle bing so lang
biß ein hand brest vber den wasen.

Welchs der beste Mist sey.

Der aller best mist ist zu den Bäumen
der schormist/ der wol erfaulet ist. Nach
dem ist Schafmist/ nach dem Rhümist/
der ganz aller erfault. Roßmist ist nicht
nütz/ darumb so soll man den zum Bäume
men nicht nemen.

Wie man die neuen Pelzer bewaren soll.

So man ein Pelzer hat in die Erden
gesetzt/ so soll man denselbigen mit dem
wasen wol bedecken / bey dem Stamm/
denn die wasen seyn nütz vber Winter
für die Kelt: Vnd vber Sommer für hitz/
auch soll man von ersten vber den Wint
er den Erdestam mit stro verbinden.

Wie man die Pelzer soll von anfang ziehen.

Ein schlechten vnd geraden stam von
der erden auff zu ziehen/ so thut not/ das
man sie fein binde in der jugend/ zu einer
stangen/ die wol verhefft sey/ in der Er
den bey dem stam/ Ist der groß/ so muß
man

man zwö stangen stecken/ auff beyde seiten/ Es sollen auch die stangen steiff stecken/ so soll man den Stamm des Pelzgers binden / zu beyden seitten hin vnd her/ damit man jm/ on alle mühe/ hübschlich alle krüm mag abziehen/ nach der weyl/ Man soll allzeit legen / zwischen das band vnd pelzger ein büschlein gras/ damit die band dem pelzger nicht schaden bringen.

Wie man beständige vnd lang bleibliche Pelzger ziehen soll.

Wölle ihr erziehen lang bleibliche Bäume/ mit werhaffttem alter/ so soll man gar nicht zwen Erdstämme/ auff einer wurgeln ziehen/ man sol sie von einander in der wurzl reissen/ Ir solt auch auff eim Pelzstock zwey zweyg nit über zwey jar siehn lassen. Mein rath ist/ das man es hindan schneide/ im andern jar/ so es noch new vnd jung ist.

Nota:

Ist der Pelzstock so groß/ so setzt drauff 3. 4. oder aber 5. zweyg/ vnd ist das die ursach/ Ein grosser Pelzstock treget vil safft/ wo nit vil zweyg wurden darauff ge'ezet

gesetzt/ so möcht der Stock seinen safft
nicht vergiessen/ vnd ertrüncke also inn
seinem selbst eygnen saffte.

Nota:

So aber die zweyg haben hölzer ges
schoben/ welches dann vnter ihnen das
hübschte vnd am schicklichsten ist/ das
soll man lassen bleiben auff dem Stam.
Aber die andern alle soll man abschneide
den von dem Stamm hinweg.

Nota:

So man vermerckt/ das die zweyg
haben gesichert auff dem stock/ vnd ver
wümmert/ so ist dann die rechte zeit/ die
andern zweyg hinweg zu schneiden.
Dann zwey zweyg auff ein stock gelasse
sen/ nimbt ewiglich kein gut alter.

**Wie man die Pelzer soll schneide
den von anfang.**

Ir solt wissen/ das am aller besten ist
zuschneiden die Pelzer/ im anfang/ von
jugendt auff/ man soll im kein Ast nicht
lassen / von einem Jar zu dem andern/
Sondern ein geraden stam ziehen/ in die
höhe / das ein gerader Mann ohn ver
hinderung/ vmb den Baum mög wol
gehn.

B 2

Nota.

Nota.

An jungen Pölzen soll man kein äst
nicht leiden / in keinen weg / die sich zu
der erden neygē / allein soll man die stehn
lassen / die sich schiefen vber sich in die
höhe / vnd hindan in die weite / das
zeucht ein rechte Baumzucht.

Nota.

Kein zweyg das hinein wechset zu dem
stamm / soll man stehen lassen / dann es
trägt allzeyt vnartige frucht.

Wie man die Zweyg brechen soll.

In rechter guter maß die Zweyg zu
brechen / so soll man sie brechen hinter
des jars Schößling / eines halben fins
gers lang.

Nota.

Etlich mercken die Zweyg / wo sie seyn
gestanden gegen der Sonnen / vnd also
setzen sie die wider auff den Pölzstock /
Aber Wolffgangus Schmag Gärtner
zu Reichenbach / hat kein achtung dar
rauff / sonder wie sich ein Zweyg schiefte
auff den stock / so es allein gerad stehet
auff dem Stock / vnd hat gut glück der
sach gehabt.

Wie

Wie man die brochnen Zweyg behalten soll.

Ein grüblein sol man graben/ an ein
gestatten/ vnter einem wasen/ innwen-
digs hol/ als lang die Zweyg sind/ Inn
dise höln sol man legen/ die Zweyg/ vnd
kein Erdrich dazu/ aber ein guten dickern
wasen soll man stecken für das loch/ so
bleiben sie gar frisch / als lang man sie
behalten will.

Nota bene.

Kein Zweyg soll man in ein Wasser
legen/ zu behalten/ sie werden alle was
sirsüchtig.

Zu was zeit gut sey zu pelken nach dem Mond

So man pelken will/ soll man anfas-
hen 3. oder 4. Tag / nach dem neuen
Mond vmb Georgi/ aber Herr Wolffa-
gang Schmarz Gärtner zu Reichena-
bach/ acht nicht wie der Mond stehet/
so der safft kömmt/ so hebt er an zu pelken.

Wie man pelken soll / vnd die Zweyg auffsetzen.

Anfänglich soll man die Pelgstöck

abschneiden/ mit einem subtilen bogen
sägeln/ ein spann oder zwey von der er-
den/ denn soll man die platten des stoc-
fs fein beschneiden/ ganz wol mit einem
wolschneidenten schnitzer/ also das die
rinden dem holz gleich sey.

Nota:

Wo dann die Rinden kein Ast nicht
hat/ da soll man das zweyg hin pelzen.

Nota.

Ob der Stocß kurz ist/ so hat es kein
jreung/ Man soll in abpelzen/ biß an die
Eiden/ so kompt er desto lieber.

**Ursach/ warumb gut sey hoch
zu pelzen.**

Darumb soll man auff hohe Pelzer
pelzen/ wann so er ein jar verdürb/ Das
man in hinfürs ein ander jar möchte ab-
pelzen/ so schneitt man nit mehr danon/
dann was am ersten pelzen ist verdor-
ben vnd dürr worden.

Nota:

So die zweyg auff einem Pelzstocß
sind verdorben/ so schenst der Stocß von
dem stammen schußling auß/ von na-
tur/ die soll man im wachssen lassen vnd
stehen/ vnd ob man ihm die neme/ so er-
grünt

erändt der stoch in seinem eygnen safft/
den er nit möchte vergiessen/ vñ verdürbē

Von der Bawmsalben.

Was zu derselben gehörig/ solt jr wiß
sen/ man soll nemen/ Wachß/ Sartz/ je
des gleich vil/ das soll man leutern zus
ammen vñd seychen/ durch ein Tuch/
denn soll man ein wenig Bawmöl das
runter thun/ vñd wol durch einander rü
ren/ darnach soll man die salben gießen
in ein gfaß auff ein kalt wasser. *Prove Vn
gurntion.* Ist die Salben zu hardt/ so soll
man sie widerzerlassen/ vñd mehr ein öl
darunter thun/ doch das man sie nicht
zu wäych mache/ Wann sie ist/ wie ein
Pflasterzug zu wunden/ so ist sie gerecht.

Nota:

Die Salben die soll man außwendig
an die rinden nit schmiren/ sonder allein
auff die platten des Pelzstocks/ das die
Salben das zweyg nicht berüre.

Nota.

Wo das zweyg die rinden haß zuris
sen/ da soll man es salben mit dem Rhüa
lot/ vñd nicht mit der Bawmsalben

Wie man das Rhükot sol bereiten.

Das Rhükot zu den Bäumen / soll man also bereyten / damit man schadhafft Bäume curirt / Nim drey theyl weich Rhükot / vnd ein theyl weichen Lāymen / laß wol temperiren durch ein ander mit wasser / recht / wie ein vesten tæg / so ist dise Salben bereyt.

Nota.

Dann so macht inn die Erden vnbrettern ein kleine truhent / die dem wasen gleich stehe / darein sol man das Rhükot thun / wo man es sonst behelt / so wirt es alzeit hardt vnd vnartig.

Folget die Lehr / wie man Pelzen soll.

Wer da pelzen will / der wisse / das ein jeglich zweyg ein signatur oder merckzeichen hat / dabey man es vber die maß wol mag erkennen (das ist nodositet an dem zweyg) als lang es das selbig jar gewachsen hat / welches dann die Pelzgermeister heysen das Jar / Mitten in das selb jar / schneid hinein in das zweyg biß auff den kern / vnd vntersich gespißz eins glidlang / oder ein wenig lenger.

Nota.

Nota.

Denn so thu das schwarz rindlein
von dem zweyg / als weit der schnit ist /
biß auff das grän hütlein / als lang
es in die rinden soll hinein gehen / so ist
das zweyg bereyt an stat.

Nota.

Einem jeglichen zweyg soll man vor
stechen zwischen Holz vnd Rinden / mit
einem beinlein / das gformirt sey wie der
schnitt ist / nach dem soll man das zweyg
hinein stecken / vnd wol hinan zu dem
Stammen finden / mit einem past / als
lang das zweyg in stock ist gangen.

Nota.

Darnach soll man haben feine kleine
zwecklein / die man zu beyden seitten des
zweygs soll einstecken / zwischen past
vnd rinden / versach / das die rinden bald
hinzu halt / zu dem zweyg vnd an das
holz / so wimmert es gar fein: Wo man
es aber nicht recht hinzu bringt / so ge-
winnt es gar vn sauber Knöpf / vnd siehe
vnwercklich.

Nota.

Nach dem allem / so soll man die plat-
tentz pelzstocks salben mit der bann-
salben.

Nach der Salben / so soll man legen
 auff die platten / ein hauben von dem ge-
 machten Rhülöt / gericht rber sich / wie
 ein dach / mit fleiß verstreichen / damit
 kein Regen hinein mög fallen auff die
 platten.

Nota.

Etlich Pelzmeysser ziehen darüber
 rinden / das thut Herr Wolffgang nit /
 vnd sagt vrsach / Es wachsen darunter
 die vnсанbern würme / so man nennet die
 Ohrhöller / denen er allzeit feind ist ge-
 wesen / vnd sie sehr hat veruolgt.

Wie man der Pelzer soll warten
 so sie seyn für sich kommen.

Nach einem Monat / so ihr gepelzt
 habt / solt ihr zu allen zweygen beschen /
 was gewurtzelt hab oder nit / Was dan
 kommen ist / das ist schön vnd feyst an-
 zusehen / Was aber verdorben ist / das ist
 schwelck vnd pleich. Was dan der zweig
 seyn / die da kommen seyn / denselben soll
 man das band auffschneiden / das paßt /
 damit sie zu dem stamm gebunden seyn /
 (daß das zweyg mög mit ruhe entpfan-
 gen den safft von dem Stamm) Man
 soll

sol das band lösen sauberlich vnd hübsch
lich/ mit einem Messer hinein vnter das
kot/ doch das man das Rhükot nit be-
weg. Mit dem wechset das zweyg vor
statt. Wo man aber auß lässigkeit/ die
zweyg also gebunden lesset bleiben / so
wachsen die zweyg zunichtig / vrsach/
wann der safft mag vor dem band nicht
so frey vber sich/ als vngelunden.

**Von dem Bähnlein/ wie es geformt
seyn soll/ damit man vorstehe.**

Das Bähnlein soll also gestalt seyn/
Es sol eins fingers lang seyn/ als für die
handhaß/ darnach soll es haben ein ab-
satz/ geformt wie ein zweyg / in aller
maß/ das man will pelzen/ eins gliedes
lang/ auff der einen seiten gegen der rinde
symbol / auff der andern seiten ge-
gen dem Holz/ soll es ganz flach seyn.

Nota bene.

Alle Schößling / die an den Bäumen
vnd Pelzern aufwachsen / der soll
man kein stehn lassen/ wann sie entziehen
den safft den zweygen / vrsach / wann
der Safft der vber sich solte kommen/
denn

den nemen an sich die Schußling vnter
an dem Stam̄ / denn wo der safft vnter
mag bleiben / so steigt er nicht vber sich.
Auch mag der Barom vmb so vil nicht
wachsen. Es verderben auch die Auf-
schuß / die newgepelzten Zweye am
allermeysten.

Nota.

Wo sich aber begibt / das die Zweyg
auff dem pelzstock verderben / so ist gut
vnd thut noch / das man die schußling
an dem Stammen wachsen laß / das
mit der Pelzstock sein Natürlichen safft
mag vergiessen / Ohne das / ertrinct er
in seinem selbst eygnen safft.

Wie vil Zweyg auff ein stock gehören.

Auff ein pelzstock / der grösser ist /
denn ein finger / setzt Frater Wolffgang
gus Schmag von Reichenbach / allweg
zwey Zweyg / gegen einander vber / auff
dem Stam̄ / Er hat auch allweg das
auffsehen / das die Zweyg gerad sich
schliessen auff den Pelzstock.

Nota.

Darnach vber ein jar / welche Zweyg
ihm

Im wol gefelle/ das leß er bestehen/ vnd
das ander schneider er ab / vnd thutes
hinweg.

Nota:

Er schneide den Stammen von vns
ten herauff gegen dem rechten zweyg/
das der Stam gesinck sey in den schnie/
so mag kein regen darauff bleiben / vnd
verwimmert gar gern / vnd also gform
irt seyn / Wo man aber den Stamm
leß gleichen/ also/ so verwechslet er harte
vnd langsam/ vnd felle der Regen dar/
ein/ vnd ist vnartig.

Nota.

Nach dem allen soll man den schnie
mehr salben mit der Baromsalben/ dar
nach mehr ein hauben von dem Rhū
lot vffsetzen / vnd das zweyg binden zu
einem stänglin/ das es der wind nit ab
breche / auch in allweg soll man legen
zwischen zweyg vnd band/ ein Büschlin
gras für das fretten.

Nota:

Ihr solt auch wissen / so auff einem
Peltzstock / die zweyg seyn für sich kom
men/ so gehört eins abher zu thun/ das
soll nicht geschehen / so lang / biß das
zweyg

zweyg/ das bañ bleiben sol/ sey gewach-
sen vnd eins fingers groß worden / so ist
es zeyt / das man seinen gesellen förder
thu / von ihm. Vrsach/ wo das zweyg
kleiner ist/ vnd jm sein gesell genommen
solt werden / so will der Stock sein safft
wie vor/ vergiessen/ so ist die begyr ne
genommen/ vnd also ertrincter in sein
selbst safft/ vnd verdirbt.

Nota diligenter:

Auff einen Pelzstock/ soll man doch/
nicht zwey zweyg durch / schlechtes ste-
hen lassen/ als etlich stehn lassen / denen
die zweyg beyde wol gefallen/ vnd ver-
schonen der beyden in zum schaden. Zu
dem sagt Herr Wolffgang Schmanzu
Reichenbach Gärtner/ das zwey zweyg
auff einem Pelzstock/ nimmermehr ewig-
lich kein gut alter nemen / so sehr mö-
gen sie zusammen nicht verwümmern/ der
Regen fall zwischen die zweyg hinein
auff den stock/ von der weyl / so fault der
stam/ vnd von tag zu tag / so nimbt der
Bawm ab/ vnd nimbt kein alter.

Nota:

Ist aber der Pelzstock dreyer finger
dick/ so mög man drauff setzen 3. zweyg/
ist

Ist er eins arms groß, so sol man darauff
setzen 4. oder 5. Zweyg / nach gutdun-
cken. Doch, das ist die meynung, das ein
Zweyg stehe von dem andern / zwen
zwey finger.

Nota:

So jr nun wol habet gepelzet / so thut
denn noht / das man sie wol bewar / mit
sangen / die man soll veruesten in der er-
den / vnd das Zweyg darzu binden / das
es die wind nit mogen bewegen.

Wie man die pelzer sol schneiden

Gut zu schneiden / alte oder junge
Bäume / die recht zeit ist in dem April-
len / man mag auch zu diser zeit / die Pel-
zer mit nutz schneiden vrsach / wann
von den alten Bäumen mag man die
Zweyg nemen / von den abgehawen
Ästen / one schaden die sonst verdürben.

Nota:

Aber die beste zeit / ist in dem Brach-
mond / so der Wäyß blühet / oder 8. tag /
vor oder nach Vlrici / da ist gut die alten
vnd grossen Äste / abzuschneiden / vrsach /
im Mayen hat sich der safft außgeteilet /
inn

in alle zweyß des Baroms/ vnd mag zu
gund nicht außdringen / wo die rinde
offen ist / wann der safft ist verlauffen/
vnd was man schneidt / das heylet gern/
wann der safft vberylet niemand: Das
geschicht in dem Aprillen nicht / da hat
man sich des saffts genug zuwehren.

Nota:

Wo ein ast auff dem andern ligt / so
so soll man den abschneiden / der sich nie
wol schickt.

Nota:

Wasserschüßling / vnd was nit frey
schüß sind / der soll man gar kein siehen
lassen / an den geschlachten Bäumen.

Nota:

Also solt ihr erkennen die Wassers
zweyß / die Wasserschüßling siehn gang
zu nahent bey dem Stamm / vnd auff
den grossen ästen / vnd ist jr art / das sie
wachsen ganz schlecht / vbersich / vnd
wachsen nicht in die weite / als die na-
türlichhen zweyß thun / also erkennet sie.

**Wie man die äste soll abnemen/
von den Bäumen.**

Ein grossen ast abzunemen on schä-
den.

den (der sich nicht schidet) von einem
Bawm/ soll man nemen ein Pelzsäge/
vnd in ablegen/ von dem Stamm hina
dan/ ein hand breyt / darnach soll man
in erst hinzu schnatten/ mit einem sch:oe
eisen / das zwey oder drey finger breyt
sey / vnd soll ein guten reiff haben vnd
dünn geschliffen.

Nota:

Man soll den ast am aller genäwesten
am Stamm schneiden hinzu/ so mag er
balde heheylen / Wo aber die äste nicht
groß seyn / da bedarff man der Pelzsa
gen nicht darzu.

Nota:

So man ein ast will abschneiden/ so
soll man die rinden / vor ganz ledigen/
von dem Stamm/ zu rings umb/ so reißt
sich die rinden nicht ein/ Wann das ein
reissen / thut dem Bawm grossen schad
den.

Nota:

Den Bawm soll man mit ganzem
fleiß glatt zu schneiden / das er nicht
schifferich sey/ so heylet es gar schön vnd
bald/

Nota:

Nach dem/ soll man den schaden sal
ben/

Ben/mit der Bawmsalben/ also laßt ihn
stehen / darnach vber drey tag / so vers
streich den schaden mit dem Thütor.

Cautela;

Ein geschlachten Baum solt jr nicht
mit einer hacken lassen schneiden/ dann
man macht damit vil wunden in die rin
den / sie dorren gerne darvon auß. Vor
allen dingen soll man der Rinden scho
nen/ damit man sie nicht schifferig ma
che/ vnd die erfür gehe/ so heilt sie gerne
vnd schön/ vnd wirt glatz.

Wie man der Baum Kranck heyt heylen soll.

So jr Krancke Baum habt/ oder noch
bekommet/ von dem sie außdorren/ vnd
werden vnfruchtbar/ so sein der Kranck
heit drey/ oder aber vier/ die erst ist die
Matter/ die ander ist die Six/ die dritt ist
der Krebs/ die vierdt ist der Warm/ die
kündt jhr also erkennen/ Wo die Rinden
an einem Baum schwarz ist/ da will
der Kranckheit eine kommen/ oder sie ist
vorhin gegenwertig/ So schneide in die
rinden/ ist sie schwarz/ vnd dazu dürr/ so
hat der baum die Kranckheit mit gewalt/
Darnach

Darnach schneidet flach hin nach / so
lang biß ihr kommet auff grüne vnd leb-
bendige rinden / vnd frisch holz. Lasset
euch nit erbarmen / es thut not / man soll
nichts schwarz bey der grünen Rinden
lassen. Wo fr in die grünen rinden schnei-
det / hat kein irrung / so mans nur salbet
mit der Baum salben.

Nota:

Wo aber die Kranckheit nit ganz vff
das holz hat verzert / so sol man auch nit
weiter schneiden / denn auff das lebens-
dig / so bedörfft jr der Baum salben nit /
dann last nur mit dem Rhükot den stam
uberstreichen / als weit der schaden ist / so
heylet es gar schön darunter / vnd ihm
schadet die Sonn nit darvor.

Ursach / warumb die Bäume kranck seyn.

Die Kranckheit der bäume können / als
offt werden sie erstoren in dem Winter /
noch vil mehr werden jr kranck / so man
daran würfft oder schlegt / Dann so ein
Baum wirt starck geworffen oder ge-
schlagen / so erhascht die rinden / vnd
wirt erschüpfft von dem holz / so dann
wechset darunter der wurm.

Wo man solchs mercket an einem
 Baum/ so schneidet die rinden als bald
 herauß / was erhascht vnd erschupffe
 ist/ biß auff das gesundt vnd lebendig/
 darnach salbet den schaden des baumes/
 mit der Baumsalben/ darnach leget jm
 ein hawt an/ mit dem Rhütel.

Nota.

So man bey oder vmb die Bäumen
 haect oder hawet / soll man die hawen
 nicht an den Baum schlagen / so man
 die erd von der hawen klopffen wil/ da-
 mit auch nicht auch geschehe/ wie in vn-
 serm Garten Reichenbach/ darinn wir
 wil der Francken Baum haben/ die vns
 ein Garttenknecht zu entwichet bracht
 hat/ mit solchen schlegeln der hawen/ so
 er im zeit des haecten oder hawens an die
 Bäume gethan/ dann solchs die bäume
 gar sehr krancket/ vnd zimlich schadet.

Nota.

Wo ein Baum der maß von schlägen
 oder würffen schadhafft wirt / soll man
 jm zur zeit/ so vornen angezeigt/ solchen
 schaden schneiden/ wie jr Bericht seyt.

Wie

Wie man vnfauber Bawm an der rinden/soll schön vnd sauber machen.

Ob ein Bawm wirt / ranhe / grobe
rinden wollen gewinnen / oder haß / so
soll man nemen ein Bawmmesser / das
die Gärtner nennen ein Schabmesser /
damit soll man schaben / die groben rin-
den all von dem Bawm / so soll man
doch verschonen der lebendigen rinden /
als weit man mag / wo sie aber wirt be-
rürt / hat kein irrung nicht / allein schabt
die groben rinden alle herab / versorgt
allein / das man nit auff das holz hin-
ein schab / Nur es sey / das der Bawm
krank sey (wie oben gesagt ist) das
man das krank alles herauf schneidet /
biß auff das holz / so soll man in salben /
wie ob stehet / 2c. Wo aber das nit ist / so
sol man den ganzen Erdstammen über-
streichen / mit dem Rhükot / so gewinde
der Erdstamm ein schöne vnd glatte
rinden.

Nota.

Die arbeit soll auch geschehen zu der
zeit / als man die Bawm schneidet / wie
vor stehet.

C 3 Nota.

Nach:

Kein Wos / soll man auff einem ges-
schlachten bawm nit lassen wachsen/
denn die bawm werden davon vnfrucht-
bar vnd vntüchtig.

So ein Bawm regt mailig Obs.

Tregt ein bawm vnfauber vnd mailig
Obs/ so bore ein loch inn den stamm/
mit einem Meber / einer querchen hand
hoch von der erdē/ ein wenig x berwarts/
mitten inn den stam / biß auff den kern/
(den erkent man wol in dem Meber) so
soll man auffhören/ denn so rinnet her-
auß das handig wasser/ vnd safft/ dar-
nach vber drey tag/ solt jr das loch wider-
rumb verschlagen/ mit einem nagel/ von
einem grünen Hagendorn/ das soll ge-
schehen in dem Aprill. Auch der Meber
soll eines fingers groß seyn/ damit man
das loch bore.

Wie man den Bäumen las- sen soll.

So jr schöne bawm wölle ziehen/
die

die nicht gründig seyn / vnd glattrinden
haben / so solt jr in zu adern lassen / in dem
Brachmon vmb S. Vlrichs tag / so nes
met ein scharff Messer / das ein gesenck
ten spiz habe (wie ein Schnitzer sol has
ben) vnd rigel dem Bawm die öbern
schwarzen rinden auff / nit tieff / allein
das öber häwel / also solt jr ein zug thun /
mit dem Messer / an dem Stamm ganz
hinab zu thal / auch an den grossen ästen
vergleichen.

Nota.

Ist der Bawm klein an dem Stam /
als da seyn die jungen ver wachsen Pel
zer / die eins daumens dick seyn / so hat er
einer läß genug / Ist der Stam zweyer
daumen dick / so gebt ihm zwol läß gegen
einander über. Ist der Stam eins arms
dick / so solt jr im drey läß geben / gleich
ingetheylet an dem Stamm. Ist der
Stamm dicker / so solt ihr ihm geben
als crengwels / gegen ein ander an dem
Stam

Nota.

Dermassen mag man auch den grossen ästen lassen/ nach ihrer größ/ soll die laß seyn/ vil oder wenig/ also mag man schön/ sauber vnd glatt Bäumen ziehen,

Nota.

Wo man den Bäumen dermassen also läßt/ so werden sie bald starck vnd groß an dem Stamm.

Cautela.

Wo man aber der maß den Bäumen nit zur ader ader leßt/ so zerreißt natürlich der safft die rinden selbst/ ganz harte dauon werden die Stämme der Bäume/ vngeschaffen an der rinden/ als vil man sihet.

Merck ein *Cautela.*

So jr wolt ein oder mehr Pelzer vmbsetzen/ von einer stat an die an die ander/ so er nun außgraben ist/ vnd auff der erden lige/ so schneidet jm alle gipffel ab/ an allen ersten/ die er hat/ eines fingers lang/ alle sampt auff ein aug/ was der Pelzer diß jar hat vom holtz geschossen/ das kompt dem Pelzer zu fruchtbarem statten/ vnd zu nutz/ wann er scheußt zu den augen schön widerumb auß.

Nota.

Nota.

Wo ihr die lehr nit haltet/so wirt der
pelzer vngeschaffen an seinen zweygen/
vnd die güpfel besitzen all/ vnd wachsen
nit/ vnd gewinnen knoden/ Nota.
Dis beschneiden soll geschehen/ in dem
Apullen.

Ein selkame art zu Pelzen in den Kern.

Wolt ir in den Kern pelzen/ so ist das
die mähnung / Man soll nemen darzu
klein stöck/ vnd die auffspalten mit ei-
nem schnitzer/ eins glids lang/ darnach
schneid das zweyg/ das ir drauff pelzen
wolt/ dryecket/ eins kurzen glids lang/
vnd befecht/ das an den drey örtern das
grün häwtlin an dem zweyg bleib/ vor-
aß biß auff das mittel deß schnits/ So
ir das wolt einstoßen/ in den stöck/ solt ir
besehen/ das die ecke deß zweygs/ recht
einkömen in den Kern/ deß Pelzstöcks/
damit der Kern sein safft möge geben/
in die hawt deß zweygs. Daß kein holtz
nimbt an sich/ den safft/ nur die rinden
vnd der Kern tragen dem Baum safft
zu.

C 5

Nota.

Nota.

Nach dem allen/ soll man in verbin-
den/ vnd bewaren / wie oben verzeich-
net ist.

Wie man schön rot Obs pel- zen soll.

Des stücks mag ich euch nicht gewen-
ren/ich hab es selbst nicht probirt/ doch
mögt jr das versuchen/ Man sol nemen
Hechtenblut / so man das zweyg will
auffsetzen/ wenn das zweyg geschnit-
ten ist/ so soll man es stossen in das blut/
vnd also auffpelzen. Es sollen schön rot
frucht davon wachsen: *Probate.*

Nun volgt/ wie man süß Obs soll pelzen.

So jr gern Hönig Obs wolt haben/
ist das die lehr / so das zweyg an die stat
ist geschnitten/ so soll man es stossen in
ein Hönig/ vnd also auffsetzen.

Nec hoc ego probavi.

Sawer Obs zu pelzen.

Wolt ihr sawer Obs pelzen/ so solt ihr
das zweyg stossen in Weinessig.

Nota.

Nota:

Bitter als ein gall ist / so soll man es
flossen in Gallen. *Ex his nihil.*

So ein Baum blühet / vnd trege nie
Obst / so hort ein loch in den Stämmen /
biß auff den kern / darein thut Quecksil-
ber / mit Leyn vermischet / das loch ver-
baw mit einem Nagel / von grünen Has-
gendorn / das gschehe alles im Aprilen.

Wie man Vngerisch öpffel soll pelzen.

Vngerisch öpffel / so jr die wolte haben /
die pelzt man also: Man soll nemen die
beyschüß / von den alten Bäumen / die
bey dem Stamm auß der Wurtzel wachse-
sen / die soll man von der Wurtzeln reisse-
sen / vnd die setzen.

Nota.

Es sagen etlich Pelzmeyster / das kein
Vngerisch zweyg gepelzt / Obst trage /
Aber ich *Frater Vuolfgangus* hab das auch
nicht probirt / noch deß nie versucht.

Wie man Kewittenbaum soll pelzen.

Die Kewittenbaum sol man also pel-
zen /

gen / Man soll auch die außschuß / auß
der wurzen nemen / die solt ihr von der
Wurzel lassen reissen / wie oben stehet
von den Vngerischen / vnd das man da
Klein würzelein verschone.

Nota:

Die Schußling / von den Krüuten
soll man setzen an ein ort / da der grund
trocken ist / vnd feyst Erden hab.

Nota:

Man soll sie am Jar / von der Wurzel
reissen / als ist vmb Mittfasten / so wan
vor gefür in die erden kan kommen.

Wie man Welsch Nußbaum pflegt zu pelzen.

Welsche Nußbaum / haben die art
an ihnen / das man den Kern soll pelzen /
vnd je mehrer vnd öffter man sie von ei-
ner statt an die andern setzet / je frucht-
barer der Baum wirt. Wenn man die
Nußbaum in der Jugend offte umbsetzt
So werden in das alter fein Baum da-
rauß / sie werden artig / schön vnd groß /
an dem kern / vnd sehr dünn an der schale.

Nota:

Die Welschen Nußbaum / soll man
setzen

setzen in einen Baumgarten / an ein
ort (auch der end in dem Baumgar-
ten) das der schatte von der Sonnens-
chein/kein fruchtbarn Baum mög be-
rühren/ wann wo ihr schatten hinkrütet/
das schwelct alles von Natar vnd ey-
genschafft des Tuffbaums/ Es seyen
Leut/ Vleß/ Bäume/ Laub oder Gras.

Nota

Wolt jr der ding haben ein Exper-
iment/ Hat einer ein Ring an seinem fin-
ger/ den er nit bald mag gewinnen/ der
leg sich ein stunde/ in den schatten eines
Tuffbaums/ so gehet der ring ohn alle
mühe von dem finger/ also schwelct der
schatten von den Welschen Tuffbäu-
men.

Nota remedium.

Die in den Baumgärten umbge-
hen/ die wissen wo Tuffbaum seyn/ da
seyn auch die Würme die man Ohrhöl-
ler nennet/ vnd ob sichs begeb/ das ein
Menschen/ der Wurm einer in ein Ohr
keme/ so sol man in zu einem Tuffbaum
weisen/ denn so schneidet ein plätzen auß
der rinden/ des Tuffbaums/ als weit
das Ohr ist/ thu die rinden hinweg/ vnd
ihm halt das Ohr hart an den Baum/
vnd

vnd schlag ein Handtuch / zwischjen den
baum vnd dem Ohren / hinumb / damit
der gschmack von dem Baum inn das
Ohr kompt / so hebt sich der Wurm von
stund an auß dem Ohr / vnd gehet in den
Baum / das stück hat probirt Abt Mel-
chior von Prüel / ist probirt.

Für die Rauppen / die das Laub abfressen.

Es sagen etlich Bücher vnd Pelz-
meister / so man pelzen wöll / so soll man
kauffen ex *Apotheca Mirabolana Citrini* (das ist
gestalt wie nuß) gemacht zu puluer / dar-
nach mache ein loch mit einem neßer / in
den Erdestämmen / biß auff den Kern /
vnd thu deß puluers darein / man sol das
loch widerumb verbawen / mit einem
grünen Hagendorn / so sol dem Baum
kein Wurm nichts thun. Herr Wolff-
gang Schmarz / sagt er hab das nie pro-
birt.

Nota:

Auch sagen etliche / so man das zweyg
wölle auffpelzen / so sol man in das loch
gepuluerisirt welsch Weyhrauch werf-
fen /

fen/ denn soll man das zweyg auffstecken, Neß hoc probavit Hortulaniger Reichenbacensis

Nota

Etlich die thun gefeylte Hirschhorn inn das löchlein / vnd also setzen sie das zweyg auff.

Für den Reißfen.

Für den Reißfen den Bäumen schädlich / sagen die Pelzmeyster / man soll die bäum umbhawen bey dem Stammem / vnd die grub offen lassen / biß die blähe vergehe / denn sol man das Eidrich wider zuwerffen.

Wie man den Bäumen guten grund machen soll.

So der grund in einem Baumgarten nicht gut ist / soll man all jar bey dem Stammem der Bäume ein grub tüncken mit dem besten Mist / der wol verwesen sey / vnd gut Erden / die soll man gleich nemen.

Wie

Wie man umb die Bäumen

haben/ oder hacken soll.

In ein Jar soll man das erdreich so
wasenlos umb die Bäumen herum
ist/ drey mal umbhaben oder hacken/ in
dem Merzen/ Aprillen/ vnd im Mayen.

Nota:

So ihr bey den Bäumen last umb
haben/ oder selbst umbhacken wöllet/
so wisset wie man sich darzu stellen solle/
im haben soll man stehen/ das man die
setten allweg zu dem Baum kehre/ so
hawet man die Wurtzel nicht leichtlich
ab/ wo man aber das förder/ oder den
Rück zu dem Stamm kehret/ so hawet
man gar leicht die klein wurtzel ab/ die
doch dem Bäumen den meysten safft
tragen/ vnd zu wenden oder bringen.

Nota.

Man soll das Gras nicht wachsen
lassen/ so weit man umb die Bäumen
hawet oder hacket/ sonder es sampt sei
nen wurtzeln außreißen/ sonst wächst
es bald/ vnd allweg wider.

Nota.

So man bey den Bäumen umb
hawet/

hawet / so werden gar leichtlich / bald
vnd gmeyniglich die kleinen würtzelein
des Baums ab vnd herauß gehawen/
die soll man denn hübschlich vnd fleiß
fig hinwider vergraben.

Nota.

All außschuß an den Erbstämmen/
soll man hinweg thun / vnd der keinen
lassen wachsen / wann sie nemen den
safft gar sehr an sich / vnd schaden den
Bäumen an irem gewächß.

Nota.

Man soll sie auch hawen ober ha-
den/ gar fleißig wie in den Weingär-
ten bräuchlich.

Wo die Hasen die Bäume schin-
den/ nagen vnd beschädigen.

Wo die Hasen gewohnen in die
Bäumgärten/ da schinden sie die Pel-
zer zur Winterszeit/ da sol man nemen
Gäysßkot / mit Gäysßhaaren vermische/
vnd als ein gemüß kochen/ damit sol man
die Stämme bestreichen/ Item Schwef-
fel

fel auch mit darunter gekocht/ ist gut/ so
nagen die Hasen nicht mehr dieselbigen
Bäume/ so hiemit bestrichen seyu.

Wie man das Obß ratsam ab- nemen soll.

Läger Obß/ soll man abnemen/ im
auffnemenden Mond/ das soll man le-
gen von ersten/ von dem Vaf von stund
an inn ein Keller / dazu kein lufft nicht
mög kommen / aber inn der Thür soll
man haben ein dampff loch / das beyde
des Tags vnd die Nacht für vnd für of-
fen stehe / Ohne das / würde das Obß
leichtlich vnd mit gewalt faulen. Man
solles auch oftmals sauber vnd fein
fleissig erkläuben / so werdet ihr schön
Obß haben vnd erhalten/ weit vber das
Jar.

Wie man den Mäusen soll weh- ren in den Baumgärten.

Es kompt zu etlicher zeyt/ das die
Mäuß ihr löcher gewinnen bey den pels-
tern / vnd fressen denselbigen die Wur-
gel

geläß/ den soll man also wehren/ Wo
die Mäuß seyn / löcher oder wohnung
ihnen vmb die Pelzer gemacht haben/
So soll man ein lebendigen Krebs ne-
men/ vnd denselben inn das Mäußloch
schießen/ so läßt er von art nit/ er geht
an alle end in die löcher/ also vertreibet
er die Mäuß hinweg / Sie erharren
oder er wartten auch seiner nicht / Vnd
so er dann letztlich darinn stirbt / so blei-
ben sie aber nicht / von wegen des ge-
stancß / so das faulende as/ des todten
Krebs/ von sich givet.

Wie man auch den Ameyß wehren soll.

So die Ameyß kommen an ein Pel-
zer/ die vil vnd sehr grossen schaden dem
Pelzern zufügen / denen soll man also
wehren/ Nimß einen Belzfleck/ zweyer
finger breyt / vnd verhefft ihn als bald
an den Stamm des Pelzers / vnd zaus
die Wolle dises Belzfleckß vorhin / so
solte ihr des gewieß seyn/ das kein Ameyß
darüber kriechen. Wo es aber darauff reg-
net/ vnd die Wolle von dem Regen zu-
sammen

sammen läuffe/vnd die Ameyssen wider
darüber lauffen/so zauset die Wolle wü
der / sie kommen nicht daran oder darü
ber hinauff an die stämmen/ das möge
ihr wol für gewieß halten / vnd dem
glauben geben.

Ego ipse probavi, inter medi
cinas meliorem.

Explicit ars Hortulanica,
per me fratrem V Volfgangum
Schatz Australem, professum in
Reichenbach, vltra triginta an
nos exercitata, & per me fratrem
Cyriacum Prucker conscripta,
Anno Domini 1501, ipso die
Transfigurationis Domini, &c.





Gedruckt zu Nürnberg/durch
Hans Koler.



